

গণপ্রজাতন্ত্রী বাংলাদেশ সরকার
তথ্য অধিদফতর
বাংলাদেশ সচিবালয়
ঢাকা

সংবাদ গতিধারা

জাতীয় দৈনিকসমূহে প্রকাশিত সম্পাদকীয়'র সারসংক্ষেপ, গুরুত্বপূর্ণ নিবন্ধ ও ফিচারের সংক্ষিপ্তসার

সংখ্যা : ১২৬/২০১৭

ঢাকা, রোববার ২ জুলাই ২০১৭, ১৮ আষাঢ় ১৪২৪

আজকের দৈনিক পত্রিকাগুলো নিম্নলিখিত বিষয়গুলোকে প্রাধান্য দিয়ে খবর ছেপেছে :

- ১। হলি আর্টিজান হামলার এক বছর : পাশে থাকার জন্য বন্ধু রাষ্ট্র
ও সরকারের প্রতি কৃতজ্ঞতা পররাষ্ট্র প্রতিমন্ত্রীর
- ২। জঙ্গিরা দুর্বল হলেও নির্মূল হয়নি : সড়ক পরিবহণ মন্ত্রী
- ৩। সাম্প্রদায়িকতা সমৃদ্ধ বাংলাদেশ গড়ার পথে বাধা : সংস্কৃতিমন্ত্রী
- ৪। টানা তৃতীয়বার রাজস্ব আদায়ে লক্ষ্যমাত্রা অর্জন
- ৫। পিপিপি প্রকল্পে ১০ বছরের কর অব্যাহতি
- ৬। উৎপাদনশীল খাতে বেশি করে এসএমই ঋণ দেওয়ার নির্দেশ বাংলাদেশ ব্যাংকের
- ৭। স্পেনের সঙ্গে বাংলাদেশের রফতানি বাণিজ্য বাড়ছে
- ৮। মানবতার সেবায় রোটারি ক্লাবের অবদান অনস্বীকার্য : স্পিকার
- ৯। নতুন প্রজন্মকে জাতির প্রত্যাশা পূরণে অগ্রণী ভূমিকা নিতে হবে : শিক্ষামন্ত্রী
- ১০। সংগীতজ্ঞ করুণাময় গোস্বামী ও মুজিবোদ্ধা সৈয়দ শহীদুল হক এর মৃত্যুতে প্রধানমন্ত্রীর শোক

১। হলি আর্টিজান হামলার এক বছর : পাশে থাকার জন্য বন্ধু রাষ্ট্র

ও সরকারের প্রতি কৃতজ্ঞতা পররাষ্ট্র প্রতিমন্ত্রীর

গুলশানের হলি আর্টিজান বেকারিতে সন্ত্রাসী হামলার পর গত এক বছরে বাংলাদেশ সরকারের পাশে থাকার জন্য বিদেশি ব্যক্তিবর্গ, বন্ধু রাষ্ট্র ও সরকারের প্রতি কৃতজ্ঞতা প্রকাশ করেছেন পররাষ্ট্র প্রতিমন্ত্রী শাহরিয়ার আলম। প্রতিমন্ত্রী শাহরিয়ার আলম তাঁর ফেসবুক পেজে দেওয়া এক পোস্টে বলেন, কঠিন সময়ে বাংলাদেশের পাশে দাঁড়ানোর জন্য বিদেশি জনগণ ও সরকার বিশেষ করে ইতালি, জাপান, ভারত, যুক্তরাষ্ট্র এবং জাপানের আন্তর্জাতিক সহযোগিতা এজেন্সির (জাইকা) প্রতি আমরা কৃতজ্ঞতা প্রকাশ করছি। তিনি আরো বলেন প্রধানমন্ত্রী শেখ হাসিনার নেতৃত্বাধীন সরকার সকলের সহযোগিতায় সন্ত্রাসবাদের বিরুদ্ধে লড়াইয়ে সফল হয়েছে। সূত্র-ইত্তেফাক (পৃ.৩,ক.১), ডেইলি স্টার (শেষ পৃ.,ক.৮), নিউ নেশন (পৃ.১,ক.৬)।

২। জঙ্গিরা দুর্বল হলেও নির্মূল হয়নি : সড়ক পরিবহণ মন্ত্রী

আওয়ামী লীগের সাধারণ সম্পাদক এবং সড়ক পরিবহণ ও সেতু মন্ত্রী ওবায়দুল কাদের বলেছেন, বাংলাদেশে জঙ্গিরা দুর্বল হলেও এখনো পুরোপুরি নির্মূল হয়নি। এক্ষেত্রে শুধু আইন-শৃঙ্খলা বাহিনী বা সেনাবাহিনীর ওপর নির্ভর করলে চলবে না। আমাদের জনগণকে সঙ্গে নিয়ে সচেতনতা সৃষ্টি করতে হবে। প্রধানমন্ত্রী শেখ হাসিনার নেতৃত্বে জঙ্গিবাদের বিরুদ্ধে সোচ্চার হওয়ার আহ্বান জানান তিনি। গতকাল ১ জুলাই শনিবার রাজধানীর গুলশানের হলি আর্টিজান রেস্তোরাঁয় হামলার এক বছর উপলক্ষে সেখানে জঙ্গিদের হাতে নিহত দেশি-বিদেশি নাগরিকদের প্রতি ফুল দিয়ে শ্রদ্ধা নিবেদন শেষে তিনি এসব কথা বলেন। ইত্তেফাক (পৃ.১,ক.৫), ইনকিলাব (পৃ.১,ক.৬), ডেইলি সান (পৃ.১,ক.৬), নিউজ টুডে (শেষ পৃ.,ক.২)।

৩। সাম্প্রদায়িকতা সমৃদ্ধ বাংলাদেশ গড়ার পথে বাধা : সংস্কৃতিমন্ত্রী

মুক্তিযুদ্ধের চেতনা নিয়ে আমরা যে সমৃদ্ধশালী বাংলাদেশ গড়ার লক্ষ্যে কাজ করে যাচ্ছি তার প্রধান বাধা সাম্প্রদায়িকতা বলে মন্তব্য করেছেন সংস্কৃতিমন্ত্রী আসাদুজ্জামান নূর। তিনি বলেন, যারা মানুষ হত্যা করে তারা কোনো ধর্মের অন্তর্ভুক্ত হতে পারে না। কারণ কোনো ধর্ম মানুষ হত্যা করা শেখায় না। গতকাল ১ জুলাই শনিবার সম্মিলিত সাংস্কৃতিক জোট আয়োজিত এক শান্তি সমাবেশে তিনি এই মন্তব্য করেন। হলি আর্টিজানে সন্ত্রাসী হামলার বর্ষপূর্তি উপলক্ষে কেন্দ্রীয় শহীদ মিনারে এই সমাবেশের আয়োজন করা হয়। সূত্র-সংবাদ (পৃ.১৫,ক.৬), সমকাল (পৃ.৩,ক.২)।

৪। টানা তৃতীয়বার রাজস্ব আদায়ে লক্ষ্যমাত্রা অর্জন

২০১৬-১৭ অর্থবছরের সংশোধিত রাজস্ব লক্ষ্যমাত্রা অর্জন করল জাতীয় রাজস্ব বোর্ড (এনবিআর)। এ নিয়ে ২০১৪-১৫ অর্থবছর, ২০১৫-১৬ অর্থবছরের পর টানা তৃতীয়বারের মতো এবারও রাজস্ব লক্ষ্যমাত্রা অর্জনে সক্ষম হয়েছে সংস্থাটি। এনবিআর সূত্র জানায়, ২০১৬-১৭ অর্থবছরে বাজেটে ২ লাখ ৩ হাজার ১৫২ কোটি টাকা রাজস্ব লক্ষ্যমাত্রা নির্ধারণ করা হয়েছিল। পরে তা সংশোধন করে ১ লাখ ৮৫ কোটি টাকায় নামিয়ে আনা হয়। ২০১৬-১৭ অর্থবছরের ৩০ জুন পর্যন্ত (সাময়িক) ১ লাখ ৮৫ হাজার ৭১ কোটি টাকার রাজস্ব আদায় হয়েছে। জনকণ্ঠ (পৃ.১৮,ক.২), ইত্তেফাক (পৃ.১৮,ক.৬), অবজাভার (পৃ.২,ক.১), ডেইলি সান (পৃ.১,ক.৭),

৫। পিপিপি প্রকল্পে ১০ বছরের কর অব্যাহতি

সরকারি-বেসরকারি অংশীদারিত্বের (পিপিপি) অধীনে অবকাঠামো কার্যক্রম গতিশীল করতে এসব প্রকল্পে কর অব্যাহতি দিয়েছে সরকার। এখন থেকে ১০ বছরের জন্য কর অব্যাহতি পাবে অবকাঠামো খাতের প্রকল্পগুলো। এ

জন্য প্রকল্পগুলোকে ঠিকভাবে হিসাব রেখে আয়কর রিটার্ন দাখিল করতে হবে। নিতে হবে ১২ ডিজিটের টিআইএন নম্বর। ১ জুলাই থেকে এ সিদ্ধান্ত কার্যকর হয়েছে। সম্প্রতি এনবিআর এ বিষয়ে প্রজ্ঞাপন জারি করেছে। সমকাল (পৃ.১০,ক.৫)।

৬। উৎপাদনশীল খাতে বেশি করে এসএমই ঋণ দেওয়ার নির্দেশ বাংলাদেশ ব্যাংকের

ব্যাংক ও আর্থিক প্রতিষ্ঠানের মোট ঋণের অন্তত ২০ শতাংশ ক্ষুদ্র ও মাঝারি শিল্প (এসএমই) খাতে বিতরণের নির্দেশনা বহাল রেখেছে কেন্দ্রীয় ব্যাংক। তবে খাত ভিত্তিক বিভাজনের ক্ষেত্রে উৎপাদনশীল খাতে বেশি জোর দিতে বলা হয়েছে। এছাড়া জাতীয় শিল্প নীতির আলোকে এসএমইর সংজ্ঞা ও ঋণ সীমা পুনর্নির্ধারণ করা হয়েছে। গত ২৯ জুন বৃহস্পতিবার আলাদা দু'টি সার্কুলারের মাধ্যমে এসব নির্দেশনা দিয়েছে বাংলাদেশ ব্যাংক। সূত্র-ইত্তেফাক (পৃ.১৮,ক.৭)।

৭। স্পেনের সঙ্গে বাংলাদেশের রফতানি বাণিজ্য বাড়ছে

স্পেনের সঙ্গে বাংলাদেশের রফতানি বাণিজ্য ক্রমান্বয়ে বাড়ছে। চলতি ২০১৬-১৭ অর্থবছরের জুলাই-মে মেয়াদে (প্রথম ১১ মাসে) ওই দেশে ১৮৩ কোটি ৩৬ লাখ ৫০ হাজার মার্কিন ডলার বা ১৪ হাজার ৭৮৭ কোটি টাকার পণ্য রফতানি করা হয়েছে; যা ২০১৫-১৬ অর্থবছরের একই সময়ের তুলনায় ২ দশমিক ৪ শতাংশ বেশি। রফতানি উন্নয়ন ব্যুরোর (ইপিবি) সর্বশেষ হালনাগাদ থেকে এই তথ্য জানা গেছে। সূত্র-জনকণ্ঠ (পৃ.১৮,ক.৫)।

৮। মানবতার সেবায় রোটারি ক্লাবের অবদান অনস্বীকার্য : স্পিকার

স্পিকার ড. শিরীন শারমিন চৌধুরী বলেছেন, আত্মমানবতার সেবায় রোটারি ক্লাবের অবদান অনস্বীকার্য। 'মানুষ মানুষের জন্য' এ ব্রত নিয়ে মানুষের দুঃখ-দুর্দশায় তাদের পাশে দাঁড়াতে পারাই প্রকৃত মানবতা। মানব সেবার এ দৃঢ় প্রত্যয় নিয়ে কাজ করলে জাতিসংঘ-নির্ধারিত টেকসই উন্নয়ন লক্ষ্যমাত্রা-২০৩০ অর্জনে বাংলাদেশের খুব বেশি সময় লাগবে না। গতকাল ১ জুলাই শনিবার ঢাকায় বঙ্গবন্ধু আন্তর্জাতিক সম্মেলন কেন্দ্রে রোটারি ইন্টারন্যাশনাল ডিস্ট্রিক্ট ৩২৮১ আয়োজিত 'রোটারি বর্ষ উদযাপন-২০১৭' অনুষ্ঠানে প্রধান অতিথির বক্তব্যে এ কথা বলেন তিনি। সমকাল (পৃ.৭,ক.৫)।

৯। নতুন প্রজন্মকে জাতির প্রত্যাশা পূরণে অগ্রণী ভূমিকা নিতে হবে : শিক্ষামন্ত্রী

নতুন প্রজন্মকে জনগণের প্রতি দায়বদ্ধ থেকে পরিপূর্ণ মানুষ হিসেবে গড়ে ওঠার আহ্বান জানিয়ে শিক্ষামন্ত্রী নুরুল ইসলাম নাহিদ বলেছেন, 'জাতির প্রত্যাশা পূরণে তাদের অগ্রসৈনিকের ভূমিকা পালন করতে হবে।' শিক্ষামন্ত্রী গতকাল ঢাকা কলেজ অডিটোরিয়ামে কলেজের একাদশ শ্রেণীর ছাত্রদের ওরিয়েন্টেশন ও নবীন বরণ অনুষ্ঠানে প্রধান অতিথির বক্তৃতায় এ কথা বলেন। গতকাল ১ জুলাই শনিবার সারাদেশে ২০১৭-২০১৮ শিক্ষাবর্ষের উচ্চ মাধ্যমিক পর্যায়ে ক্লাস শুরু উপলক্ষে কেন্দ্রীয় কর্মসূচির অংশ হিসেবে মন্ত্রী ঢাকা কলেজে একাদশ শ্রেণীর ক্লাস শুরুর উদ্বোধন করেন। সূত্র-সংবাদ (শেষ পৃ.,ক.৭) সমকাল (পৃ.৫,ক.১), ইন্ডিপেন্ডেন্ট (পৃ.৩,ক.৬), নিউ এজ (পৃ.৩,ক.৪)।

১০। সংগীতজ্ঞ করুণাময় গোস্বামী ও মুক্তিযোদ্ধা সৈয়দ শহীদুল হক এর মৃত্যুতে প্রধানমন্ত্রীর শোক

একুশে পদকে ভূষিত সংগীত বিষয়ক লেখক ও নজরুল বিশেষজ্ঞ অধ্যাপক ড. করুণাময় গোস্বামী গত শুক্রবার রাতে রাজধানীর একটি হাসপাতালে চিকিৎসাধীন অবস্থায় পরলোকগমন করেন। তাঁর বয়স হয়েছিল ৭৫ বছর। তাঁর মৃত্যুতে প্রধানমন্ত্রী শেখ হাসিনা গভীর শোক প্রকাশ করেছেন। শোক বার্তায় শিল্প-সাহিত্য ও সঙ্গীতে করুণাময় গোস্বামীর অবদানের কথা স্মরণ করেন প্রধানমন্ত্রী।

একাত্তরে মুক্তিযুদ্ধের গেরিলা কমান্ডার সৈয়দ শহীদুল হক আর নেই। মুক্তিযুদ্ধে গেরিলা বাহিনীর প্রধান সুইডেন প্রবাসী শহীদুল হক গত ৩০ জুন শুক্রবার রাত ১২টায় কাতারের রাজধানী দোহায় একটি হাসপাতালে

চিকিৎসাধীন অবস্থায় ইত্তেকাল করেন। তাঁর মৃত্যুতে শোক প্রকাশ করেছেন প্রধানমন্ত্রী শেখ হাসিনা। এক শোকবার্তায় প্রধানমন্ত্রী মহান মুক্তিযুদ্ধে তাঁর অবদানের কথা উল্লেখ করেন। সূত্র-সমকাল (পৃ.১৫,ক.৮), ইত্তেফাক (পৃ.৩,ক.৬), ইন্ডিপেনডেন্ট (শেষ পৃ.,ক.৮), নিউ এজ (শেষ পৃ.,ক.১)।

সম্পাদকীয়

- ক. **ইত্তেফাক, জনকণ্ঠ** : গাবতলী পশুর হাটে অগ্নিকাণ্ডের ঘটনায় উদ্বেগ প্রকাশ করে এ ঘটনার সুষ্ঠু তদন্তের পাশাপাশি অগ্নিকাণ্ড রোধে সচেতনতার আহ্বান।
- খ. **সংবাদ** : ব্যাংকিং খাতে অনিয়ম দুর্নীতি বন্ধে ঋণখেলাপি ও তাদের দোসরদের আইনের আওতায় আনার দাবি।
- গ. **সমকাল, প্রথম আলো, ইনকিলাব** : সুইস ব্যাংকে বাংলাদেশিদের আমানত প্রায় সাড়ে পাঁচ হাজার কোটি টাকা যা আগের বছরগুলোর তুলনায় আরও বৃদ্ধি পেয়েছে উল্লেখ করে পাচার হওয়া এসব অর্থের উৎস খুঁজে বের করে পাচার রোধে যথাযথ ব্যবস্থা নেওয়ার সুপারিশ।
- ঘ. **যায়যায়দিন, ইত্তেফাক** : দফায় দফায় চালের মূল্য বৃদ্ধিতে উদ্বেগ প্রকাশ করে সরকারকে এ ব্যাপারে কঠোর নজরদারির সুপারিশ।
- ঙ. **ইন্ডিপেনডেন্ট** : রাজশাহীর বরেন্দ্র অঞ্চলে বাড়ির আঙ্গিনায় সবজি ও ফলমূলের বাগান করার প্রবণতা বৃদ্ধি পাওয়ার পরিপ্রেক্ষিতে এ কাজে সে অঞ্চলের কৃষক ও ক্ষুদ্র নৃ-গোষ্ঠীর লোকজনদের যথাযথ প্রশিক্ষণ দিয়ে আরও অধিক ফলনের ব্যবস্থা করার ওপর গুরুত্বারোপ।
- চ. **ডেইলি স্টার** : ঢাকা দক্ষিণ সিটি করপোরেশনে স্থাপিত ময়লা ফেলার বিনগুলো নষ্ট হওয়া ও চুরি হয়ে যাওয়ার চিত্র তুলে ধরে এ কাজে যথাযথ তত্ত্বাবধানের ও চুরি প্রতিরোধে ব্যবস্থা গ্রহণের সুপারিশ।
- ছ. **নিউ এজ** : সড়ক দুর্ঘটনায় মৃত্যুবরণকারী সাংবাদিক মোজাম্মেল হোসেন মন্টুর পরিবারকে ক্ষতিপূরণ হিসেবে অতি দ্রুত এক কোটি ৬৯ লাখ টাকা দিতে বাংলাদেশ বেভারেজ ইন্ডাস্ট্রিজের প্রতি আপিল বিভাগের নির্দেশ যথাযথভাবে প্রতিপালনের প্রত্যাশা।
- জ. **নিউ নেশন** : বাংলাদেশের প্রায় ১০ মিলিয়ন শিশু, তরুণ ও যুবক প্রাথমিক বিদ্যালয়ের শিক্ষা কার্যক্রমে নাম অন্তর্ভুক্তকরণের বাইরে থাকায় সরকারকে দারিদ্র্যদূরীকরণে ও শিক্ষা খাতে বরাদ্দ বাড়ানোর সুপারিশ করে সম্পাদকীয় প্রকাশ।

নিবন্ধ ও ফিচার

আলোকিত বাংলাদেশ পত্রিকায় প্রকাশিত ‘শিশুশ্রম বন্ধে চাই সামাজিক প্রতিরোধ’ শিরোনামের নিবন্ধে শিশুশ্রম বন্ধে সামাজিক ও রাজনৈতিক সদিচ্ছা এবং অঙ্গীকার থাকলে বাস্তবায়নের পথও উন্মুক্ত হবে বলে অভিমত প্রকাশ।

#

শুকলা/মরজিনা/সাইদা/ তানিয়া/২০১৭/৯.০০ ঘণ্টা

